

四庫全書

集部

欽定四庫全書

集部  
蘭庭集卷上

詳校官編修臣翟、槐

中書臣劉源溥覆勘

覆校官中書臣康儀鈞

校對官助教臣羅萬選

謄錄監生臣李元雋

欽定四庫全書

集部六

蘭庭集

別集類五

明

提要

臣等謹按蘭庭集二卷明謝晉撰晉字孔昭

吳縣人工山水嘗自戲稱為謝疊山其名明

詩綜作晉而集末贈盛啟東一首乃自題葵

丘謝縉又附見沈大本詩一首題作寄謝一

縉殆一人而兩名者耶集中有承天門謝恩

值雨詩則明初嘗以布衣應徵者卷首有汝南周傳浚儀張肯二序張肯稱晉詩二百餘篇而此集所存乃不下四五百篇考張序作於永樂甲申而集末有永樂丁酉十月既望之作丁酉上距甲申凡十四載積詩之多宜其過于張序所云矣周傳謂姑蘇之詩莫盛于楊孟載高季迪而孔昭得二君之旨趣張肯謂其得性情之正而深于學問雖稱許不

無稍過然其雅秀俊逸要亦足自成一家固  
不徒以繪事傳也乾隆四十一年十月恭校

上

總纂官臣紀昀臣陸錫熊臣孫士毅

總校官臣陸費墀



蘭庭集原序

詩自國風以降言選者稱漢魏言律者獨稱唐而已為選而不宗漢魏非選也為律而不宗唐非律也選豈易言哉自梁昭明太子選漢魏以來諸傑作者成集而詩以選稱矣律亦豈易言哉自唐諸作者因時所尚分為五言七言皆以對偶切實音韻諧協者中其律而詩以律稱矣則欲學詩者舍古人奚取法哉然後人擬之者不失之陳則失之淺調格似矣而音響則未然也音響

似矣而意趣則未易及也由古及今以詩名家者幾何人哉姑蘇自我朝以來文運與時大興以詩鳴者則有高君季迪楊君孟載為尤二君之詩言選則入於漢魏言律則入于唐音響調格宛然相合而意趣或有過之雖識者莫能辨其異也余友謝孔昭氏自少即嗜詩得二君之旨趣故其為詩不苟必擬於古人調格似矣而音響之不入者不作也音響似矣而意趣之不佳者不作也不作則已作則必欲如古人焉是將駸駸乎漢魏



唐者也今編其彙分為選詩律詩絕句凡若干首屬余  
為序余豈知詩者哉然聞志於古者志古人也詩而逼  
於漢魏唐之作則雖以今之詩為漢魏唐之詩可也詩  
而不能效古其如古人何哉孔昭有志於古而用意若  
此蘇人翕然稱之則蘇人以詩名家而不絕者將不繫  
於孔昭乎愧余非能詩者不足以知之姑叙所聞於簡  
以塞其請云癸未歲七月既望汝南周傳叙

書云詩言志心之所之之謂志詩者言其心之所之者

也在心為志發言為詩有諸內而形諸外也心之所之  
之不同而其詩亦有憂抑傷感憤怨悲戚喜樂和悅之  
異觀其詩則知其所志矣故窮夫出婦逐臣逆旅必多  
憂抑傷感憤怨悲戚之言騷人勝士富翁貴客必多和  
悅喜樂之語非才之優劣而詩之不同也心之所之之  
不同也觀其志則知其人矣雖然世道有升降風氣有  
盛衰而其詩亦因而隨之者有矣其言之喜樂和悅者  
大抵多盛世之音也其不然者則其人大過人而不

繫於時者也又豈可一於心之所之而然乎嗚呼詩之言志有不同如是耶詩之言志雖不同然其同者則同乎得其性情之正也詩而不得其性情之正則不足以言詩矣欲得其性情之正非學問之功其不可得乎詩而得性情之正斯可以言詩矣余少也亦嘗執筆而學言也由其志之卑陋而又無學問之功其所言惡能得其性情之正哉今觀夫謝君孔昭之詩凡二百餘篇其憂抑傷感憤怨悲戚而不傷也喜樂而不流也英英乎

其風韻也翩翩乎其英俊也皜皜乎其潔白也而又皆  
得其性情之正噫非有學問之功者其能然乎余方自  
愧有不可企及之歎而又命余叙其篇目余非能詩者  
將何所言乎姑書詩之言志者以為叙云永樂元年五

月十日浚儀張肯序

欽定四庫全書

蘭庭集卷上

明 謝晉 撰

晚春五首用楊孟載韻

水淹榆莢半堆牆  
細雨生寒潤袷裳  
芳草欲迷樓外眼  
飛花應斷客邊腸  
風簾靜捲紫春絮  
烟篆微銷過午香  
睡起不知庭院晚  
陰陰高柳映斜陽

年來疎散任清貧  
藜杖荷衣白葛巾  
傍竹看山行怕晚  
對花臨水坐傷春  
擬將蘭棹為漁父  
未許桃源避俗人

回首仙踪無處覓東風吹綠半江蘋

移家住近闔閭城花繞衡門柳拂楹新社未來先有燕  
一春將盡始聞鶯杯綠醉少長嫌淺中為涼多却愛輕  
日暮小齋清沐罷科頭閑取一棊橫

心閒無夢到南柯惟惜殘春又欲過一逕綠陰芳樹合  
半簾紅雨落花多閑吟詩到清新句坐看杯生歛滌波  
自是經朝書倦讀不闕中酒卧林阿

節序匆匆改歲華滿庭芳草一池蛙吟髭近為傷春白

病眼長因中酒花夢裡暫歸憑蛺蝶江頭相送憶琵琶  
客窓過盡清明日風雨昏昏噪莫鴉

過楓橋留別城西諸友

煩君遠餞意偏饒念我離羣乍寂寥祖帳雨催詩欲就  
郵亭風勁酒頻澆舟移射瀆黃昏近路轉江邨碧樹遙  
記取今宵分手處烏啼時節過楓橋

早春過望亭驛喜晴追次唐李嘉祐韻

遠望晴烟散綠蘋推篷起坐整烏巾野花開處多臨驛

水鳥飛來似送人，愁裏聽窮三日雨。客邊吟別一分春，  
今朝已有尋芳客，來往東風陌上塵。

洛社夜泊二首

沽酒新安驛，停舟洛社橋。家鄉看漸遠，愁殺是今宵。  
風動波搖月，窓開光映燈。今宵棲泊處，始覺在毘陵。

旅泊奔牛堪下次錢經韻

收帆時候日初斜，旅泊奔牛近酒家。風起凍雲天欲雪，  
溪流寒月浪生花。連宵詩酒叨倍席，明日圖書擬共車。



且向琪南同一醉任他人語夜喧譁

新豐港

歲逼窮冬未肯晴陰寒日日阻修程雲迷故里家何在  
潮入新豐水又生酒市有花梅作旆客舟無血氣為觥  
羈懷自是多傷感愁絕非闕聽雨聲

丹徒灣莫泊

浦溆春潮去復回客舟風阻未能開半篷殘雪留寒在  
幾樹斜陽送晚來望闕心隨雲影度思家愁聽鴈聲哀

京師要擬明朝至先向江神酌一杯

臘月二十七日次江口

出浦望斜月隔江聞櫂歌家從今日遠愁比昨宵多野  
燒疑烽火鄉心逐逝波一年惟兩日又向客邊過

再過金山寺貽錢經

江心孤峙鬱崔嵬一水中分兩岸開風外晚鐘隨遠棹  
兩邊春樹鎖層臺龍驚呪鉢山僧去鷗送供厨賈客回  
未及登臨君莫恨更期歸日擬同來

除夜宿茅公渡盛秀才寓館

爆竹喧喧起四隣  
茅公渡口歲逡巡  
風塵路遠難為客  
霜鬢來朝畏見春  
簷外雨聲催臘盡  
枕邊鄉夢到家頻  
遙憐堂上圍爐處  
傳飲屠蘇少一人

元日雨中與鄉友朱瑛留盛秀才館

梅柳共繽紛  
京華又見春  
還持新歲酒  
相勸故鄉人  
曉雨妨來客  
寥廓絕去輪  
緣知佳節在  
不敢淚沾巾

尋陸玘值雪就宿

迢遞似山陰無舟亦見尋  
呼兒寒貰酒留我夜彈琴  
燈暈花初結壺殘漏欲沉  
不知門外雪今夜幾多深

久雨寄陸玘

到京將一月多半雨中春  
衣潤香薰徹囊空酒貰頻  
絨書傭乞米卧雪倦干人  
獨賴雲間友相過不厭貧

人日

風雨荒齋睡起遲擁衾無語獨支頤  
今朝客裏逢人日却憶故園梅發時

春日旅懷二首

行囊蕭索總塵埃  
花柳參差是處開  
賴有平生豪興在  
從教春色惱人來

游子思親淚未乾  
春來頓覺帶圍寬  
客邊憔悴無人問  
空把家書日日看

春思二首

依依殘夢帶餘醒  
欹枕思量起未成  
應是朝來春色好  
街頭時有賣花聲

簾幙風微篆有香  
起來時候已斜陽  
梨花雲冷不成夢  
蛺蝶一雙飛過牆

夢歸

遊子思家切  
終宵只夢歸  
覺來疑乍別  
續去可重依  
稚童牽袂孌  
下機他時真  
到日應訴見  
還非

題紅梅

半生詩酒度年華  
屢醉揚州散吏家  
今日重來東閣裏  
吟成方識是梅花

題畫

兩樹松花落逕苔一溪烟霧鎖香臺多情最是林間客  
半啟荆扉待我來

題謝季文夢草池詩卷

詩思蕪春思蒙茸觸處新輕隨烟冉冉低拂浪粼粼清  
趣休文藻芳情託翠蘋吟來能彷彿覺後怯逡巡風靜  
踈簾午水澌淺水春懷賢今總切追咏更何人

寄陸地

石頭城下自分攜無復連床聽曉鷄故里音書寒鴈杳  
空江雲樹暮天低春來白下喜新約夢去花間憶舊題  
猶念雪深留宿夜酒醒詩就小樓西

寄馬敬

生涯心事兩相違舊業荒涼恨未遺秋盡始看黃葉墮  
歲寒惟許赤心知橘香江上思親處鴈過燈前憶弟時  
賴有賢郎能繼述年來能解誦君詩

寄錢經

經初任刑部主事因愆調察院  
鞫囚時疾未愈賦此以寄云



聞君近滯白雲司，已分清貧衆所知。  
病久家人情稍薄，路遙鄉友問應遲。  
空江莫雨懷同櫂，孤館寒燈憶共詩。  
欲擬清谿尋舊約，未知何日到京師。

寄唐鸛

梅花清入夢，夜半忽思君。  
千里窓前月，孤心江上雲。  
詩壇誰結伴，酒社惜離羣。  
何日陪吟杖，尋題竹下分。

歲盡日寫懷

去年寒盡日正起，故鄉思今日空齊。  
裏翻思在客時。

雨窓寒夜

江雲黯黯夜寒生  
風暈鐙花結未成  
枕畔淚珠簷外雨  
隔窓同滴到天明

送陳紹先

東風初解潁池冰  
之子今朝遠赴征  
故里相知惟我最  
少年同輩有誰能  
梅橫水驛門前月  
船映江村寺裏鐙  
此去不須憑問候  
五雲多處是金陵

元日歸城南舊居見山茶獨開感而賦之

因循兩月未還家門掩蒼苔一逕斜春意不教長寂寞  
羣芳開到是山茶

早春雨中寫懷三首

江皋日日聽鳴鳩獨卧看書嬾下樓春草何如春夢短  
人愁不似雨聲愁

小閣焚香戶半扃烏皮矮几素羅屏不因聽雨塵心靜  
長日何緣學道經

春陰漠漠鎖亭臺鶯未曾啼燕未來人事不知花厭雨

漫盛簷溜養瓶梅

狂與答吳允中見寄

昔年曾客鳳皇州，終日清狂不解愁。  
醉詠新詩驚俗客，笑扶紅袖上歌樓。  
一春每費千金賞，三度都來幾日遊。  
回首故交應感慨，相思同白少年頭。

送陳暹翁還白門兼簡翁壻吳允中

東風繚亂送飛花，啼鳥聲中換物華。  
夢境青山猶在客，春來白下未還家。  
一帆細雨空江暝，千里平蕪去路賒。

遙想館甥應待久秦淮日日望歸槎

薛彥英竹堂詩

瑛翁堂前清景勝綠玉陰森萬餘頃當年結構杳難尋  
於今漸得開三逕三逕蒼苔厚翠茵半簾湘影隔紅塵  
寄言塵外來觀者須到堦前問主人南階清問疑無日  
北牖蕭騷風雨集有時卧向石床聽薄暮不知烟霧濕  
八窓瓏蔥爽氣多林聲靜與琴聲和涼生枕簟疑秋早  
月到庭除覺夜過春風昨夜吹新綠粉穠飄香零簌簌

飛來百鳥不敢喧，畏有孤凰深處宿。此君高懷隨處安，  
我欲結交同歲寒。何當攜酒尋幽賞，日醉我青琅玕。

城西賞梅用東坡韻

昔年曾居雲水村，暗香繞榻侵詩魂。吟邊夢裡長相憶，  
清思恍到羅浮昏。今年移家近西郭，亦有一樹開南園。  
寒枝良僵蒼蘚剥，冷艷落寞春風溫。幾朝幽鳥喚人起，  
半窓疎影交晴暎。披衣起坐對觴咏，何必扣遍山家門。  
舊游已去不復醒，高歌且醉花間尊。

杏花

春意競喧嘩  
撩人半出垣  
紅輕銷醉色  
粉薄露啼痕  
搖動春疑鬧  
閑閑齊晝覺  
繁深蔽沽酒店  
斜繞勸農邨  
依柳鶯多語  
偎桃壇暗翻  
枝寒橫曉月  
窓白映晴暾  
壇靜飄琴薦  
林幽燦藥軒  
隔簾微雨夜  
香到欲消魂

送春二首

一春苦被春相惱  
及到春歸更惱人  
恠底今朝輕別去  
空留啼鳥伴吟聲

空庭草長燕交飛，獨坐閑吟書掩扉。  
風雨滿城花落盡，幾人閒得送春歸。

鴛鴦

鴛鴦逐婦何苦鴛鴦，獨可憐池塘風雨夜。  
猶並一雙眠。

題花塢醉歸圖二首

香熟家家酒花明，處處春年來為多。  
病愁見醉歸人，幽鳥喚提壺。  
桃花映酒爐，田家春社散。  
野老醉相扶。

調笑詞二章



芳草芳草二月青猶未了和煙和雨路長千里萬里斷腸斷腸斷腸腸斷飛絮落花撩亂

清鏡清鏡蟬鬢蛾眉相映朝開暮掩少塵白髮多於去春去春去春春去原上阮郎歸未

櫻桃

燦燦懸珠寶垂垂拂翠苔罵欺人不在含去又飛來

賦得江村送別送人起復

荷葉暗汀洲江村暮雨收鐘聲隨棹遠漁父對人愁起

復衣仍素行裝扇及秋驪駒歌欲盡涼月在西樓

題焦道成畫

何處畫相闕南湖銷夏灣波光浴几上颿影送窓間琴  
響來玄鶴籠開放白鷗幾株霜曉葉一帶雨晴山彷彿  
聞樵唱依稀見牧還平生賦歸興坐對轉清閒

寒鴉圖

空江陰霾斷舟檝蘆葦蕭蕭遠相接洲中棲息一羣鴉  
宛似梢頭未翻葉高枝翻凍吹將落低枝亞水驚濤惡

上林全樹多好枝何不飛去榮處樂飛不去今爭奈何  
流水孤村無網羅會待柔風布晴暖高翔遠翥迎春和  
更願年年黍禾熟飲啄飛鳴昔往復朝風暮雨亦不移  
長向田家樹頭宿

送人之京

西風掃雲天似洗紅日初昇滄海底吳歎楚舞滿船頭  
相送行人渡江水江水東流燕北飛行人此別意何之  
不辭八月雲陽路獨携琴劍朝京師京師自古繁華地

佳氣葱葱五雲際  
長安大道接天衢  
千步迴廊連主第  
銀鞍繡轂擁香塵  
蟬鬢蛾眉日日新  
幾處青樓相對起  
一羣嬌鳥共爭春  
春光浩浩花如錦  
鶯轉雕窓妓猶寢  
雲間直賣待帆歸  
白下長干燒燭飲  
憶昨少年豪興多  
北堂南陌遍經過  
雲間陸玘誇詞賦  
盧家莫愁新按歌  
聞卿亦是曾游客  
到處春風總行跡  
今朝應薦上天宮  
無復追懽似疇昔

寄沈大本

每恨經年別相思隔楚江已看秋過半復見燕歸雙夜  
雨驚寒枕涼蕉近客窓身癯幾露骨心靜不離腔興去  
詩難就愁來酒可降終當期後會談笑對寒缸

題畫

野水淨無埃秋痕欲上苔自緣涼坐久不為看山來

題吳門四老圖

四老皆無嗣故結  
好以在送死云

春風吹鬢雪娑娑半度衣冠尚永和人比睢陽還較少  
圖成商嶺不爭多樽中有酒歡須盡身後無傳老共何

金匱要略卷之三十一  
卷上  
欲擬明朝一相訪來聽林下紫芝歌

秋日山齋三首

幽獨抱微疴淹留奈歲何  
星霜秋鬢改風雨莫愁多  
養素甘泉石偷生畏網羅  
年來城府裏無事倦經過  
草白露零砌葉紅霜滿林  
初聞新鴈過知是已秋深  
病起還扶杖貧來不賣琴  
茅簷風日煖閑坐試孤吟  
寂寞無來客柴門盡日扃  
草根吟蟋蟀竹尾掛蜻蜒  
爽氣嵐侵席秋聲葉滿庭  
最憐窓裏岫相對坐閒青

病起

卧久轉無力空庭曉步遲身癯長是病人說為吟詩簾  
薄風仍怯窓明日更宜床頭餘藥在憑仗且扶持

江樓晚眺

天靜波澄練江空月近樓露涼花解語烟暝柳多愁鷗  
送征帆遠虹隨渚雨收幾家官渡外燈火候歸舟

秋夜雨窓有懷葛秀才曷

耿耿不成寐空城寒漏遲那堪聞雨夜政是憶君時簷

溜時驚夢虫聲暗助悲何當同剪燭重與話相思

秋夜

天高風露涼月清桂花冷嘹嘹雁來賓  
藪藪葉墮井空齋獨無寐茲夕惟念永如何  
床畔燈偏照離人影

喜陳孝廉繼見訪

空山初雨歇君忽扣松關林潤衣襟濕  
苔深屐齒班吟隨清興發思共白雲開  
自愧無兼味空留到暮還

重九前二日題城南書舍壁



瀟瀟風雨暗山房籬下誰能共一觴獨有黃花知節近  
殷勤留客過重陽

宿劉徵小敏喜膝校理椿遠歸

故人留宿夜遠客值歸時松火鳴茶灶燈花映酒卮交  
游者竟少聚散本無期耿耿俱忘寐空庭月漸移

將之京留別馬從兄敬

江館西風又作寒同袍還念客衣單相思後夜蘇城月  
獨向丹陽郭裏看

宿閨門

霜滿烏啼夜月寒  
客窓燈火對愁看  
故園相去無多路  
便覺今宵睡不安

夏日過吳道者新居

低垣新築未生苔  
僻近城南少客來  
鑿就盆池移石甃  
起成道院乞松栽  
琴尊適興隨時樂  
窓戶生涼四面開  
何用別尋方外住  
清閑只此是蓬萊

竹齋秋早

雲黑樹蒼蒼  
回颺動素商  
高梧鳴急雨  
脩竹翳殘陽  
爽氣侵書幌  
秋聲繞石床  
不知今夜裏  
添得幾分涼

夏日閒居

未老先踈嬾  
閒眠愛竹陰  
石邊床几淨  
風外芰荷深  
嗜酒從家窶  
攻詩帶病吟  
幽居鄰古寺  
長日有僧尋

夏夜

夏久羣囂息  
開軒皓月中  
亂螢穿薜荔  
雙鳥宿梧桐  
冰冷金盤果  
涼生水檻風  
惟愁天易曉  
塵事復匆匆

七夕詠牛女

天淨月如鈎，銀河澹欲流。  
鵲橋金背穩，龍駕綵雲稠。  
此夜應相見，平明起別愁。  
莫嗟重會杳，倏忽是來秋。

秋夜有懷王鄜州觀

孤館涼生夕，懷君又屬秋。  
蛩聲四壁雨，燈影一身愁。  
棲泊綠羈旅，飄零總宦游。  
詩成欲脩問，路遠恐沉浮。

題畫

儂家曾住白蘋州，偏墜黃塵已廿秋。  
安得千金如畫裏。

此身仍在釣魚舟

小游仙三首

偶緣溪路入天台  
嵐重霞深路不開  
洞口鶯聞仙樂響  
素娥知是有人來

瑤臺月映彤雲迥  
碧落風吹環佩聲  
試逐羣仙何處去  
麻姑今夜宴方平

借得劉君一鶴騎  
飄飄雲漢欲何之  
偶來暫駐長松下  
贏得秦翁一局棋

題畫為徐山人作

扁舟蕩漾水雲寬  
避暑曾游銷夏灣  
好是君家亭子上  
捲簾直見洞庭山

題蘇小小像

油碧車輕路去遙  
西陵松栢暮瀟瀟  
紗窓昨夜黃梅雨  
添得錢唐幾番潮

京師逢陸玘

朱雀橋頭日未斜  
逢君不道在京華  
明朝又向江南去

一路看山直到家

題梅花翠鳥圖

月墮叅橫水竹西  
雪晴時節路高低  
翠禽只恐香零落  
幾度飛來不忍啼

題荔枝山鳥圖

色欺鶴頂與鷄冠  
垂向枝頭露尚寒  
山鳥飛來休恣啄  
遐方未貢到長安

柳枝詞五首

高出離宮覆御塘暖烟晴日闌新妝舞腰妬盡東風力  
恨不移枝出建章

垂似綴旒籠似蓋遠如輕霧淡如烟陶家舊日應堪羨  
一任春陰蔽縣前

驛路溪橋野店傍幾株搖曳復遮歲年來頻為行人折  
無復柔條似舊長

纖腰困舞非因態眉黛長顰豈為愁張緒料應今已老  
可憐無復舊風流



媚眼蒙茸半入春粧樓舞榭一時新誰能更近蘓臺種  
教得吳娃盡效顰

閒居初夏七首次王校理韻

溪館陰森夏木齊雨晴新綠覆簷低清風不為塵來掃  
黃鳥多因客去啼

竹樹清清水一溪板橋南去草堂西興來自愛尋詩到  
不意兼聽好鳥啼

琴為荒涼久斷絃簡因零落不成編醉來惟愛磯邊草

留得茸茸待我眠

楊柳青青水滿塘  
荷衣初試晚風涼  
偶來亭下微吟罷  
試數新篁幾個長

雲木蒼蒼夏雨過  
望中樵逕入烟蘿  
山中惟欠流鶯語  
花比春深也較多

遙遙剡木引泉過  
靄靄茶霏散碧蘿  
芝澗忽聞山雨到  
竹窓分得夜涼多

寂寂荆扉竹裏扃  
種瓜人去雨冥冥  
一尊長恨無來客

閒住花間自醉醒

夏夜

湘簾半捲樹鳴蜩  
風露淒清玉漏迢  
素扇青奴渾不用  
卧看涼月上庭蕉

湖上

門軒湖水北四面芙蓉渚  
望望楚天遙孤帆帶飛雨

秋夜

寒蛩不可聽况復起清砧  
落葉將飛雨瀟瀟又滿林

春夜宿錢經客舍

聽斷春鳩竹外鳴，客窓微雨夜初晴。  
他鄉遇舊偏多感，對酒論交分有情。  
千里歸心隨蝶夢，半簾斜月送鷄聲。  
何時共汝還山去，剪燭連床話舊盟。

寒食旅懷

簾外春陰似去年，異鄉寒食倍淒然。  
梨花香褪猶飄雪，楊柳條長不禁烟。  
無處追游乘款段，誰家懽笑送鞦韆。  
晚來走向東鄰媪，乞與新燈照客眠。

客金陵送盛宣還吳

宮柳籠陰半已青，俄聞歸棹發金陵。  
秦淮雪盡春潮長，楚甸雲開曉日昇。  
先我還家緣客久，如君多藝更誰能。  
莫辭同醉長干酒，明日相思恨不勝。

送俞立庵應湘府聘

鶴書遠聘到巖阿，拜手幡然出薜蘿。  
天接孤帆秋水濶，門開五柳夕陽多。  
吳雲漸杳鄉邊樹，湘雨微生渚外波。  
此去賢王應待久，安車行旆莫蹉跎。

題畫二首

羽士清真侶齋居蒼翠間  
偶臨溪水上却望雲中山  
日夕鐘磬發應尋舊路還

逍遙西澗翁邂逅南垞客  
為解杖頭瓢坐飲林下石  
微醉兩忘還秋山竟云夕

清明日雨窓有懷一二同志

詩壇酒社久凋零每遇良辰憶舊盟  
四海弟兄何日會  
滿天風雨幾時晴  
青春有恨愁邊過  
白髮無情暗裏生

不道今朝又佳節竟無人話是清明

題南湖小景

南湖三月春水大射鴨船從菰上過邨前載耜唱歌聲  
村後鬪泥相應和紅桃開處見一簇白鷗飛來時兩箇  
我家亦在此湖近惟愛垂竿對山坐

自述

踈狂渾不稱儒名三十年來一未成留客未嘗教便去  
尋僧多半為閑行只愁酒盡黃花老任取秋深白髮生

近欲衣冠如古製原頭野老莫相驚

秋日雨中留飲于氏書樓

一聲新雁起平川秋水瀰茫接遠天人倚碧闌干外雨  
舟橫芳草渡頭烟歸來舉世無元亮感慨斯時有仲宣  
今日故人皆滿座不妨沉醉菊花前

宿開元精舍

落日樹陰陰禪幽靜客心香烟秋殿寂燈火夜厨深茗  
熟僧先睡詩成佛對吟自憐耽僻志只合卧雲林



長至日喜友人見過

今朝風日好喜見一陽回  
簷鵲翻晴噪家僮報客來  
履長忻有賀獻頌愧無才  
且共酬佳節深深勸酒盃

賦得秦淮夜泊送吳秀才歸吳

烟霧淡籠月泊舟依淺沙  
且沽今夕酒聽唱後庭花  
淮水迎歸路吳山看到家  
鄉中莫留滯慈母在京華

送葛南伯之洪澹巡檢

蜀中當俊傑要劍入南閩  
夜邏龍溪外秋吟海島濱  
青

山圍鎮市畫戟擁詩人羣盜知先遁禁書好更親

早春送徐枚理還越

渺渺湖光遠離情奈若何花香隨去舫柳色蘸青波  
雨晴吳甸春寒峭越羅雲歸千嶂盡雪在半篷多酒向  
愁邊貫詩從醉裏哦行裝書錯襍歸路嶺差栽南度煙  
中望西陵月下過還家應訪舊清興莫蹉跎

送傅世南

楊柳古城邊風光觸處妍畫船輕似鷁春水濶於天歌

斷人將別帆開月正懸  
回看五雲際鵬鷲去翩翩

陪唐陸二秀才游天禧寺分韻得池字

同是殊鄉客因閒偶暫期  
相携游帝里幸得到天禧  
境勝塵寰隔禪幽靜者宜御  
香曾降日鸞輅每游時講後  
僧歸院齋餘鳥下墀  
珠林花綽約杏閣燕參池  
探古巡廊久行吟出寺遲  
登臨獨惆悵後會杳難知

秋夜有懷金徵士潛

秋聲隨處起落葉暗庭除  
積雨生苔厚閒雲映竹虛  
濕

螢涼入幔點鼠夜翻書遙想維摩伴安居獨晏如

九日懷沈大本

茱萸紅映絳紗囊舊俗猶傳費長房身健喜逢高處飲  
老來不覺醉時狂已拚烏帽迎風落任取黃花插鬢香  
眼底故人惟沈約每逢佳節入他鄉

送韓醫士之京受冠帶

藥裏詩囊共一船春風相引去朝天宮槐過雨沾行旆  
林杏飄香度別筵術學試趨丹闕下衣冠歸拜采庭前

莫言微祿虧親養，積券還能助俸錢。

送朱孝廉起復

通波亭下水如天，送子離情倍黯然。  
讀禮已終三載後，辭家又向五雲邊。  
壺觴雜坐依林草，簫鼓齊鳴動祖筵。  
日暮分携凝望處，風帆漸遠孝廉船。

楊花

飛飛袞袞復揚揚，送盡春歸客路傍。  
雪為有才曾擬詠，風因無力却欺狂。  
救樓曉起縈奩白水郭，晴時滿店香。

莫向天涯凝望眼  
楚宮隋苑正迷茫

寄沈大本

幕府門西初見時  
一言投分即相知  
幾年別去身多難  
今日歸來鬢有絲  
茂苑江山皆舊恨  
小齊卮酒總新期  
何緣蠲了遐方戍  
長共吟窓計較詩

遊西塢

久作還山計  
于今漸有緣  
終當來此處  
盤礴聽風泉

客中歲盡寓懷

江邊搖落景蕭疎客裏愁驚歲暗除寒沼有冰膠破硯  
晚窓無雪照殘書青窺柳眼迎春笑粉妬梅容待臘舒  
自嘆新年歸未得故園桃李復何如

早秋送劉人材

絺綌含風晚氣清淒淒離恨似涼生伊州歌罷人初別  
何處飛來雁一聲白露半江秋月皎青霄萬里暮雲平  
金貂換取新豐酒重醉爐頭送長卿

中秋夜不見月

擬向中秋翫月來  
朱絃拂拭酒新醅  
陰雲忍到今宵暗  
不放霜娥下玉臺

溪居春晚

殘紅堆迳厚于苔  
偶與尋詩晚步來  
只道春光歸已盡  
隔溪猶有野棠開

題畫

遠汀飛盡一雙鳧  
烟樹迢迢映綠蕪  
何似載書兼載酒  
樵青搖出女兒湖



題輞川圖

木蘭紫近辛夷塢  
芳樹高高結翠陰  
回首輞川裴迪老  
不知誰與伴行吟

逢秋江釣隱

曾伴滄浪釣晚風  
如何江上又相逢  
莫辭同醉船頭月  
明日烟波各萬重

送錢經二首

秋雲漠漠樹離離  
孤館俄驚雨後時  
明日風帆江上路

看山應起故園思

烏府歸來未白頭相逢不道又深秋故園親友知多少  
若個能來慰別愁

題桃源圖

細草幽花山洞春春深閑却種桃人源頭不放漁舟入  
塵世那知有遁秦

江上

江雲漠漠曉寒生出戶行吟傍水行沙鳥底綠樓不定

背人飛過柳邊鳴

題畫二首

黃葉西風古寺秋  
雪溪南去記曾游  
年來為減尋詩興  
常對青山嬾上樓

碧樹朝籠五色霞  
家家香飯熟胡麻  
劉郎一去無消息  
開盡溪頭白葛花

北郭二首

小巷人家半掩扉  
綠陰相映柳依依  
莫言飛絮身無定

纔得沾泥自不飛

紛紛車馬向城間  
盡入朱園看牡丹  
獨有東家林下竹  
更無人去扣門看

賦得酒瓢送陸玘

形質非彫琢  
天成貯玉漿  
匏尊宜作伴  
椰榼每同將  
和月懸吟杖  
隨人入醉鄉  
最憐臨別處  
花底瀉來香

賦得桃塢晴霞送友人

城西多隙地  
一塢盡栽桃  
樹暗人家少  
花深酒旆高  
紅

霞晴散綺香露暖濡袍好向成蹊處停驂餞濁醪

賦得柳巷啼鶯送景文偉應谷府聘

何處黃鸝語垂楊紫陌深一聲初破曉千里遠流音出  
谷將求友遷喬欲上林叮嚀如有意還感別離心

賦得太湖春水送華以及歲貢

浩浩來天日溶溶接漢津光隨征櫂遠綠染客袍新瑞  
氣初銷臘思波總是春明朝禹門外一躍有誰論

賦得劍池送沈友人之京

巖樹鱗皴生鐵花一泓寒玉清無瑕  
山中有穴通海脉人間無地埋青蛇  
居僧往歲不飲井游客長時來煮茶  
安得干將復飛出贈君佩服歸京華

題鴻山鄒校理溪山小隱

舊業梁谿上青山帶草堂地形殊錦里  
風景似瀟湘竹樹踈還密蘋蕪綠更香  
幾家遙隔浦一徑別歸庄鶴伴尋詩杖  
鷗隨載酒航林霏浮野色簾影動波光  
苔厚封琴薦花輕點筆床樵歌知伐木  
漁唱罷鳴榔吟思清秋

浩書聲白晝長半邨烟雨嶂兩岸水雲鄉永望情無已  
頻過慮共忘何當謝塵事來伴咏滄浪

題埃山錢氏家山圖與子公遜賦

聞君家住處累世埃山邊處士留遺澤羣郎邁等賢緝  
熙兵燹後謠詠太平前源廢移桃補籬荒種槿編園林  
應昔日亭館繼當年境勝同韋曲圖清似輞川紅蕉凝  
宿雨粉竹弄輕烟窻白雲初起松寒鶴未還碓喧諸澗  
匯門靜一峰偏客至因觀譜人來或貸錢行高鄉里頌

書在子孫傳容我依喬木煩君置石田

送劉司稅

聞說劉司稅心懷更坦夷量寬無醉日俸薄有貧時近  
喜加新澤明當別故知城西征賦浩梅發望歸期

秋日答沈大本見寄

嬾與塵囂接端居養道心名題蕉葉遍履跡逕苔深客  
有投詩贈僧多索畫尋知君垂訪日隨興過山陰

附沈大本秋日寄謝一緡



未吟春草句先起憶君心  
黃葉閒門遍蒼苔陋巷深  
暫違如久別欲見似難尋  
回首山塘路浮雲又夕陰

南澗

空林積雨霽偶乏供  
晨炊行行入深杳  
采采南澗芝歸來  
憇亭下浩歌無人知

夢中題梅花

湖上風吹凍雪乾  
幾枝臨竹映清湍  
不論僧舍門常掩  
下馬敲開也借看

題劉松年畫仙山圖

羣山峩嵒紫翠封樓臺縹緲烟霞重青谿迥隔紅塵路  
玉洞遙連絳府宮溪邊洞山相隈隩蹊徑深深映花竹  
風散花香瀉酒瓢日高松影閒棋局巖前偶坐二三翁  
神氣蕭爽巾屨同玲瓏綠髮稀可數皎皎雙童玄且濃  
其間一仙如識面憶在芙蓉城下見曾將寶訣授長生  
還引瑤池間小宴別來倏忽三千秋舊蹤那復更追游  
何當重跨軒間鶴來會諸仙領上頭

楓橋歌送吳秀才之金陵

君不見楓橋水平流直下太湖來環繞闔閭城西北其  
間風土何佳哉層樓疊榭侵雲起望處人家半臨水水  
邊歌舞不勝春橋下帆檣停似蟻復有大道接金陵送  
客每來橋上行山寺鐘鳴知夜半漁村月落見燈明今  
朝却餞吳公子解我金貂沽渌醕帆掛長洲苑外烟衣  
沾虎阜山頭雨暮烟秋雨益淒其別緒離情無限期昔  
時應是今時景今人還誦昔人詩見說長干花似綺君歸

更莫思鄉里

送楊水虞復官沔陽

憶昨移居城北陔與子舅氏先相知君初筮仕已遠出  
我昔素昧常嗟咨今年長夏俄嬰疾一卧蕭齋浹旬日  
空庭草色斷輪蹄幽戶蛛絲徑蓬華忽驚有客扣我門  
竹間剝啄聲相聞起來倒屣出迎見知是水虞揚子雲  
自言秩滿朝京國省親告許來親側今朝堂下舞萊衣  
明日沔陽還舊職我聞沔陽湘楚間楚波浩蕩湘迴環

春至遙連渚宮澤秋清遠見湘君山水邊人家半漁戶  
唱歌捕魚自朝暮得魚歸來先報官半售商船半輸賦  
君今再任苦不難依先稅法更宜寬莫辭微祿養廉薄  
凡父嘗為委吏官

卧松軒為勾漏山人作

蒼虬連螭護書幙日夜奔濤吼巖壑碧窓幽逕淨無埃  
洞口烟霞春寂寞中有一人人中仙裁冠野服何翩翩  
手持黃庭入勾漏一卧松深三十年蒼苔為茵石為枕

偃仰看書忘飡飲萬事不到心上來一生慣向雲間寢  
有琴橫几酒盈觴怡然相對傲羲皇有時沉醉不得起  
零落滿身金粉香碧鮮寒多雲影薄露滴松梢月將落  
夢回酒醒誰為儔只有巢間兩棲鶴自憐我本林下人  
偶因為客墮黃塵今朝展圖長太息何時拂枕來為鄰

題伊宗啓望雲思親圖

朝望雲兮雲孤飛暮望雲兮無依雲悠悠兮無定山嗟  
游子兮胡不歸卻褰裳兮陟岵山萬重兮靄烟霧雖楚

尾兮吳頭水驚渡兮難度聊兀坐兮徘徊見長干兮日  
暮忽雲去兮空山我思親兮如故

送鄧司稅起復

江城初收夜來雨荷葉荷花暗汀渚蘭棹唱徹採菱歌  
一夕涼飈送殘暑昨日立秋今日涼鄧子東書還帝鄉  
飄然長揖來告別使我頓覺心彷徨憶昔年時同里閭  
茂苑長洲每游翫春風載酒泛南湖莫雨譚棋向西館  
一朝鄉老薦佳名拜受徵書上玉京天官遴擢乃小試

承恩遠赴沔陽城，司稅伊何未週歲。俄爾萱堂訃音至，  
匆匆解印賦歸來。默默哀親守喪制，總帷頌徹蓼莪篇。  
今年起復又朝天，却辭吳會春游處。又上秦淮夜泊船，  
嗟爾亦是東西客。相送殷勤陳祖席，酒酣忽起唱陽關。  
離思滿江秋月白，君今年盛更才能。鵬程萬里漸飛騰，  
莫言身為微官繫。鼎食由來自此昇。

題詠春軒詩卷

桃花一片飛吟席，筆底風光生頃刻。夢回草長滿池塘。



園柳鳴禽變晴色獨邀西叟伴賡酬一笑東君已相識  
床頭綠蟻浮甕香洗盞殷勤向文墨怡然兀坐撫長鬚  
靜對溪山如有得興來不道有乾坤醉後那能較平反  
深紅嫩白故開遲含嬌也待詩催逼須臾半語發天機  
已漏人間好消息

送復虞陳孝廉自蜀還省親回戍

十年邊戍喜今還暫解征袍復衣斑供侍未終甘旨後  
新愁又起別離間雲連蜀道秋登棧月滿瞿塘夜度關

此去定知鄉夢在依依長遠海虞山

秋日江村即事有懷沈秀才

涇上菰蒲接渚田江村風景漸淒然西鄰夜靜開畚稻  
南浦秋深罷采蓮遷客暫歸仍遠別野人多病只高眠  
明朝風雨重陽節依舊孤吟向菊邊

送卞都昌從東勝軍

朔漠風霜過暮年獨憐長路去縣縣一家數口籠沙外  
千里孤翰雁磧邊聽斷胡笳驚隴月敲殘刁斗見炊烟

儒冠且莫輕拋擲早晚徵書下九天

題崑山陳隱君玉峰清興詩卷

吳門東望鬱峩秀色凌空近可招路轉翠微知有寺  
地連滄海見生潮洞中景似桃源小雲外蹤疑石磴遙  
聞說誅茅棲隱者幾多清興逼塵囂

送吳下陳孝廉之雲南省父

西風昨夜動斑衣又趣行裝出故扉親舍望中雲共遠  
家山別後夢還依渚蓮秋半花全落沙樹涼多葉漸稀

聞說北堂萱草在明年春至待君歸

雨中周醫士邀賞牡丹

藥軒西畔一欄花留得于今有幾家  
開處每邀賓客賞栽時應待子孫誇  
苔因叢近多沾屐蜂為香微半出衙  
昨日雨中猶滿座歌鍾應不負穠華

濠上雨中晚眺

雨深雲重曉來天坐對寒城野水邊  
楊柳為誰先自老鷓鴣無伴不成眠  
溪痕漸長莎間石鴈影初沉渚外田

何處忽聞歌水調短簑歸去釣魚船

送盧孝廉志學

霏微凍雨灑輕塵臘盡江南又見春  
別酒易醺傷病久新詩多恨送行頻  
尊前袞袞誰憐客天下滔滔莫問津  
此去遐方何日到相思愁絕故鄉人

送吳文質

江上寒多酒易銷送君將上木蘭橈  
只愁雪過長安路未放春風著柳條

寄王廷桂

山連罨畫雲烟好路入苕溪水木清如此江南好風景  
故人何事不歸耕

溪山晚步

一樹閒雲一逕苔板橋南去草堂開人生未了尋幽賞  
不為看山也自來

題晚行圖

雲深谿谷不逢樵一蹇衝寒去更遙憶得匡廬山下路

曉風殘月過溪橋

題秋江待渡

鷗衝秋色去沙尾人背夕陽歸渡頭我亦有家湖水曲  
便須乘興上扁舟

訪嚴隱士

草香烟碧路高低偶興尋君水竹西情洽不知延坐久  
半林風雨午鳩啼

九月十日雨中訪徐校理留宿

滿城風雨菊開殘，過盡重陽客未還。今夕雨窗同話處，  
得疑剪燭在巴山。

過徐山人居

寥寥犬吠屋頭雲，寂寂鶯啼谷口春。莫道人間閑處少，  
人間自是少閑人。

登雪頤閣有感

昔年吳地盛繁華，平屋樓居千萬家。今日試憑高處望，  
滿城烟樹亂啼鴉。



初夏雨窓感懷

淒其風雨暗書樓病久那堪近  
麥秋綠遍桑田飛戴勝  
烟深竹墅聽鳴鳩屢因晴少常懸壁  
簾為寒多嬾上鉤  
自是春歸情思減青山莫笑倦追遊

京師病歸

嬰疾還家久未瘳  
戒驚節序倍淹留  
桃花豈解迎人笑  
燕子還能話客愁  
瘧去就床懸漢鏡  
悶來欹枕看吳鉤  
人間白髮無年少  
塵事縈心即上頭

寒食村中

流水清清映淺沙  
石林風急亂啼鴉  
荒村寒食無人到  
何處香來枳殼花

雨中放舟尋周傳秀才

捨舟登岸入松筠  
偶興源頭訪隱淪  
掃榻不須延我坐  
滿庭風雨自留人

歸城南舊居有感

不到城南十載過  
鄉園風物半消磨  
烟光慘澹人家少

日色昏黃鳥雀多長醉羈情難對酒欲狂吟興易高歌  
鄰翁問我歸何事笑指空江起莫波

早起

夜永睡已足晨興及東軒拂拭几上書靜臨窓下翻茅  
簷日初上蒲團坐方溫蕭然一室內湛焉心獨存僻居  
非索隱沉默本無言歛帙振衣起閑度風竹喧

獨酌

懷抱正紆鬱麴生偶相延呼兒具尊酌坐倚長松邊風

吹頭上巾露滴琴中絃  
山禽喚提壺交交鳴我前  
是時日亭午清陰散芳筵  
一彈復一觴漸覺身頽然  
只此謝塵俗焉知愚與賢

秋夜有懷陸都事玘

飄風從何來洒然凌我衾  
展轉不成寐彌覺涼夜深  
念彼離居客幽懷盈素襟  
粲粲對餘燼起坐正孤吟  
余亦感時邁鬢縷飈已侵  
何當展良覲盡寫乖違心

懷葛易昆季

翩翩棠棣花零亂春風裏念子弟與兄飄泊正如是一  
逐風波遷相去各萬里儒冠雖誤身戎服今已矣悵望  
楚天遙孤雲嶺頭起

懷伊庸祖

任宿久上國經歲曠鱗音衡門掩苔跡日日生綠陰篇  
書展復卷孤坐成空吟起望發長嘯清風來素襟

懷王校書觀

春陽照軒厦好鳥日已喧端居覽時物歲月循雙轅豈

無花下酒解此心中煩于馬再良覲相對共忘言

陳桓洞簫引

雕虫不蠹柯庭竹留得人間作鳴玉光鳳尋仙叫紫禁  
盤施水下桐枝宿月輪團露凝不流冷光叅差射雙眸  
赤壁癡仙醉方醒一聲吹破君山秋古龍吟水湘烟濕  
椎蛟潛舞波心碧曲終江上不見人淒淒嫠婦烟中泣

春夜謠

花梢日墮房攏黑蠟爐初燒畫屏側翠鬟重整待歸筵

嘶馬無聲桂花陌嫦娥喚月出海宮薄雲碎帖魚鱗紅  
徘徊徐下階瑤立下盡茶蘼陰轉東鷓鴣魂蝶夢芳叢底  
飄蕩春風一千里重城漏斷來不來側卧和衣聽閤啓

采蓮曲

南風揮揮水上來五月六月芙蓉開紅粧綠髻誰家女  
青苧縫裙一色裁船頭摘花歌且坐船尾夷猶搖槳和  
忽驚山雨過橫塘撐入柳陰者雨過晴來復愛錦雲柔  
爭唱斜陽不肯休趁得落潮歸又晚一彎新月在溪頭

顯曾節婦詩卷為子唐斌賦

總帷夢斷鴛鴦曉旅櫬荒涼魂縹杳深閨少婦纔及笄  
客邸夫君三十老夫沒年年經幾秋嫁時綠鬢今白頭  
膝邊有子漸成立家業崢嶸無復愁自憐年少孀居日  
舅老失明姑遘疾至親骨肉皆流離終歲戶門遭疊出  
今看堂下舞萊衣忘卻當初辛苦時妾身若到黃泉下  
相見良人心不虧

題芭蕉仕女圖



新涼未欺扇弱質自先怯芳思無人知金風動蕉葉

江南古意

江上摘蓮花逢郎日未斜停橈閑借問何處是郎家忽  
遽笑回言家住橫塘口南去第三家朱扉映疎柳明朝  
采蓮出來過喫茶不只愁風浪濶不得櫂船頭

題畫送陳孝廉謙還吳

余昔在家日聞子來觀光今余游上國子欲旋故鄉相  
逢不忍別又復留經月旅館連秋風行裝擬明發楚尾

與吳頭目斷思悠悠如何同作客君去我仍留執手立  
都門都門日已曛綠蕪江上路黃葉寺前村四望長干  
迥却念家山景親舍白雲邊野渡蒼烟暝別酒坐來醒  
吟餘思頗清揮毫圖小幅聊復繼離情明朝到泉石見  
盡應相憶煩君好為藏待我歸添墨

小院

春雲漠漠散輕陰杏子花開小院深人在碧窓初睡起  
數聲啼鳥隔芳林

宿江上

白鷺洲邊暑氣收，月明涼思滿書樓。  
酒醒夜半開窓坐，一鶴橫江萬里秋。

移家將之金陵宿楓橋

山寺烟初暝，江村月又生。  
辭家無十里，不寐到三更。  
犬逐漁燈吠，鐘催客棹行。  
從茲去鄉土，寧得是吳氓。

春日白門寫懷

興盡春衣過却寒，經旬不放酒盃乾。  
鶯嬌故况翻多語，

金匱日人三言  
卷上  
花惱吟情艷未殘白雪詞成人共接紅箋書就妓偷看  
便拚老我京華客爛醉狂歌且盡歡

秋庭雨窓

紛紛黃葉下庭柯夜永陰寒襲幔羅燈影尚憐詩骨瘦  
雨聲偏向客窓多鄉闕有夢何時到親友無書半載過  
坐久忽驚簷溜斷鳴蛩四壁助吟哦


題熊大使夢萱詩卷

官舍思親久庭喧入夢頻長隨花裏蝶繞遍砌前春開

落雖成幻栽培自感神  
芳馨忽吹散不覺一沾巾

雨中登甘露寺

多景樓前興趣清  
試憑高處散羈情  
香臺遠映金山寺  
烟樹斜連鐵甕城  
帆帶雨飛來更疾  
鷗隨潮落去還輕  
却憐南北經過客  
誰肯停橈向此行



蘭庭集卷上